

PA KADESHI BARNEA

 Aali nomwenso nganshi, umutima wakwe wali mupepi nokutuntula pali ba mailoshi amakumi pabula pali ora, efyo camoneke. Aali pang'anda pakashita akapitapo, kabili aali mumuputule aleesha ukulungw'ingw'inta nokuilungisha.

² Kabili, ukuba, cambika mwitontonkanyo lyakwa Munyina Moore, lintu umulumendo wakwe umunono, atile alefwaya ukushimikila. Aali nalimo imyaka ya kufyalwa cine lubali nangu cine konse konse, aikalilefye ukutula, "Batata, Ndefwaya ukushimikila." Eico ubushiku bumo, kucinso ca lukuta, Mista Moore atile, "Nomba mwebabwananyina," atile, "David, uwikele pano," aikele palya nga kashimikila umukulu, namwishiba, nomutwe wakwe naimya. Atile, "Alefwaya ukushimikila pakashita akanono, muno nshita yabushiku." Eico, abutukile kucintamaba. Alitolweke ukufuma mucipuna cakwe, abutukile palya, namwishiba, nokwiminina. Kabili amwene kwati kuti apitapofye. Kabili aloleshe kulubali lumo, nakumbi kulubali atile, "Cena tacabombefye," abwekelamo nokwikala.

³ Nalimonapo inshita ishing, Natontonkenye ukutula tekuti cibombe. Lelo fye. . . Ico califye bwino, nangula.

⁴ Banyina baletwimbilako, Mabel na Meda. Kuti natemwa ukubomfwa baimba nakabili inshita imo, bushe teti mutemwe? [Ulukuta lwatila, "Ameni."—Kale.] Kuti natemwa fye ukubomfwa baleimba. Limbi tukabaleke bakalongane ubushiku bwapa Mulungu uleisa munshita yabushiku, bakanjimbile ulwimbo ulo baimbile ilyo Nafumine mu chalichi. Muleibukisha ilyo cena, ifyo cena—ifyo cena cali?

Umusensenga walisambwa mu fishilwa fya
nkasa
Umweni. . .

Kabili nomba:

Bali nokufuma ku Kabanga naku Mboshi,
(Natumone.)
Ukulya pamo ne Mfumu, ukulya nga beni
Bakwe.

⁵ Ndemona kwati efyo lwenda. Ndefwaya nkabomfwepo. Nibanga bengafwaya ukubomfwa, pabushiku bwapa Mulungu uleisa mubushiku, nga tukabapo? Bushe kuti mwacita ico? [Ulukuta lwatila, "Ameni."—Kale.] Ukuba, mucine. Mabel, bushe uli muno? Bushe ali muno, Doc? Naumfwa ico, kabili Meda ali kunuma uko, eico kuti bapitamo panono. Pantu, abakashana bali nokubutuka ukufuma kuli bena, panuma yakashita, bushe

teifyo fine? Ico nacilungama. Mufwile mwapitamo panono, mutampeko uno mulungu uleisa.

⁶ Munu bushiku, ukwisa kuno, kabili inshita fye inono iyapitapo, ulupwa lwalifuminepo, kabili Nali neka na Shikulu, ukupepa panono. Naleensha ndepita pe hema lyakale, kabili nalimwene imyotoka nshitantama kunse. Namwishiba, cena ciletafye ifyakwibukisha ifyakale, pa nshita iitali iyapitapo, ilyo twalekwata, twalekwata ukulonga ukusuma nganshi, kabili kwalefika tu koloko nangu fili koloko mulucelo. Abantu baleikalafye, capamo.

⁷ Namwishiba, abengi balya abakale bali muno munshishi ileelo. Ndepilibula imibili yabo, lelo bali mu Bukata. Kabili nenkulo shaikalafye ukwisa, abaice baleya balekula. Tapakakokole ninshi twaya. Inkulo imbi ika . . . bambi, abacaice, bakasenda incende yesu. Eico naciya kuli ifwe ukwikala cila bushiku, bushe tacayana, ukwikalila Shikulu fye, Ena eka.

⁸ Nomba, Ninjishiba ukutula mailo bushiku bwakubomba ku bantu abafwile ukufuma nokuya mukubomba. Eico ifwe tuli . . . twalaesha ukufuma bwangu muno bushiku. Bushe umulimo wa lubatisho, bushe pali icintu icili conse icilekonkapo? Cisuma.

⁹ Nomba, iyi Baibele iyapalwa ecakukonka ku . . . ukufuma mubusanshi wabana abanono ukufika ku—kunshishi, naku Muulu, mpaka ukufika. Kabili twali Itemwa, pantu ifyabamo Umu emo tusanga ubutantiko bwepusukilo ubwakupususha ukufikapo.

¹⁰ Nomba, ilyo tatula Isula, lekeni tulande kuli Kalemba, ilyo tulekontamika imitwe yesu pakashita fye.

¹¹ Shifwe uwa mu Myulu, tule Mutotela, muno bushiku, pali fyonse ifyacitwa, kale mukulongana, panyimbo shakulumbanya napali . . . fyonse ificitike. Kabili tuletasha muno bushiku pakulongana muno mutenge wa ici cikulwa icinono, mwi Shina lyakwa Shikulu Yesu, pamo no bubulayo ubwawama, ukutula, “Apo ponse apo babili nangu batatu balongana mwi Shina Lyandi, Ndi nokuba pakati kabo.” Kabili natwishiba ukutula Muli pano.

¹² Kabili tuli abansansa nganshi pakwishiba, ukutula, panuma ya myaka ikana limo ne myanda pabula iyakushimikila i Mbila nsuma, kabili—kabili ilyashi lyakale ilye sonde lileshinguluka, lelo Imwe mwabafye cimo cine. Ukucinja kwa nshita, ukucinja kwa bantu, ukucinja kwa calo, ukucinja ifyakukabila, ne mibele, lelo Imwe mwaba fye cimo cine. Kabili tuli abansansa nganshi palwa ico, muno bushiku, Taata.

¹³ Pantu, tuli abansansa ukutula kuti twabelenga i Cebo Cenu, nokumona ifyo Mwali lilya, nokwishiba ukutula tulepalama kuli umo wine uwakutemwa, uwelela, uumfwa Taata uyo uwaendele palulamba wamucanga ulwa mu Galilee; atanikwe, asendele icifulo cesu, kabili aishileba umubembu uyo wafwile pa

lupanda, mucifulo cesu, asendele pa Mwine eka imembu shesu, ukushifumyapo, kabili shaposelwe kumbo. Kabili kasesema atile, “Nshakashe u Mweo Wakwe kumbo, nangula Ine ukuleka Uwa Mushilo Wandi ukumona ubonaushi.” Kabili pa bushiku bwalenga shitatu abukile nakabili, nokunina ukuya ku Muulu, uko Mwikiye muno bushiku kukuboko ukwa kukulyo ukwa Bufumu bwakwa Lesa, ukutupapatilako pafyakuyebelela fyesu. Kabili twalikwata insambu kabili insambu isha kuyebelela ukutula, icipe cesu fwebene ico cashitwa no Mulopa Wenu, icintu icili conse ico Mwalundileko mubutantiko Bwenu ubwa kulubula ilyo Mwafwile nokupanga icikonsolwelo pa Kalbale.

¹⁴ Kabili, muno bushiku, mwe Taata, twaipusha ipalo ilyaibela ku mulebeshi onse abo abalongene pesamba lya mutenge pano, muno bushiku, mwihema.

¹⁵ Twaipusha, pamo, mwe Taata, pa baume na nabanakashi, abalumendo nabakashana, abo abali kunse yacipao, muno bushiku, abo abasha Mwishiba. Twapepa ukutula Mwalaba pamo nabena, nokubaleta kuli Imwe mwebene, muno nshita ya bushiku, kabili lekeni Mupashi wa Mushilo akonkonshe ukucilapo pa mitima yabo, nokubaleta kuli Lesa Taata wesu. Fikilisheni ico, Shikulu.

¹⁶ Paleni chalichi icili conse nokulongana ukuli conse uko kulecitika mwisonde lyonse, ileleo namuno bushiku. Kabili lekeni bakashimikila bonse baputwemo ukuti bashimikile, kabili imitima ya bantu na matwi yasembululwe, ukumfwa nokukutuluka, kabili Lesa ali nokupokelela ubukata. Pantu twalombela ico mwi Shina lyakwa Kristu. Amen.

¹⁷ Kabili lekeni Shikulu alunde amapalo Yakwe muno bushiku, ilyo tuleisa kulupanda, mukusambilisha panono pa Cebo. Ili lili nge sambililo lye sukulu lya pa Mulungu.

¹⁸ Namwishiba, Nacilatontonkanya, pakashita akapitapo, ilyo nacikala palya. Namwishiba, kuti caba icintu icawamisha inshita imo, nga... Kwaliba icikulwa cimo umushaba nangu cimo, kwisamba mumusumba kuno, icikulwa cakutambilamo ifisela icitwa Dream. Ndeingililamo cilekalika abanti ikana limo ne myanda isano ukufika kumakana yabili. Kabili kuti cawama nganshi, nga kuti twakwata, inshita imo, nangu nalimo ukutwalilila kwa nshiku shapa Mulungu ishing mukukonkana, panuma yamilungu isano, nokukwata ukulongana kwakundapa, mulya mucikulwa ca Dream kwisamba kuno, nokutambisha uku kulongana, pali ora imo pamulabasa wamumusumba, pali ora imo. Teyamutenga; nalimo ikumi limo na pabula, amakumi yabili ama dolla, ifyapala ifyo, pali ora imo. Kuti naba uwansansa ukukulipilila, nemwine, kabili nga cakuti ukulongana kulya kwalipila. Bantu bamuno ukuletwamofye, nencende iisuma iyakubatumako, iyabapilibuka.

¹⁹ Kabili, namwishiba, kabili Nacisangalala nganshi pa mbila yakwa kakumba wesu muno lucelo, palwa “kuposa amasumbu.” Kabili Ninjishiba ukutila imwe bonse mwacumfwa bwino. Kabili ico nacilungama. Kabili—kabili ifwe tulingile ukuleta isabi mwisumbu, nga fintu acilanda. Kabili ico nacilungama, mwamona, ufwile ukuleta isabi mwisumbu. Kabili nomba, capamo, mulandu nshi, tuleminina.

²⁰ Nomba, Ine, mailo mucungulo bushiku, pali Munyina Junior Cash, Ndecetekela e shina lyakwe, twali kulya mukumulandilako, mailo mucungulo bushiku, kabili Shikulu alishile munshila iyakupapusha. Kabili baletele umukashana. Icintu fye cimo ico Namwene, iyo iilingile ukuba mucifyalilwa, ico wingamona nelinso lyobe, uwali pacintamba, uwafumine kwisamba kulya kucitungu cakwisamba ica Indiana, kwisamba lya New Albany nangu kuncende imo, aali mubusanso, kabili bwalyonawile imishipa yamumatwi neyafwilishako ukulanda, icakuti alefilwa ukulanda nangu ukumfwa. Kabili umushipa waliputwike pancende imo, nokuleta ubulebe kulubali lumo. Kabili umukashana, banyina, naena nefyela fyakwikatilila ameno, baleesha ukumutungulwila pamulu palya. Umukashana fye umunono, namayo, kabili nalimo ikumi limo na mutanda, icintu cimo muli uyo musango. Kabili munshila imo nangu imbi, Mupashi wa Mushilo amonekefye nokubika Africa ku ntanshi yandi. Kabili Naloleshe pali ico.

²¹ Kabili Ninkwata icimonwa icilembelwe pano pene mwibuuku, ukutila ukubwekelamo ku Africa kukaba ukwacilapo ukucila umusonkano wakubalilapo ku Africa.

²² Kabili nomba, abantu ukukana ishiba icalecitika, lelo icimonwa calecitika. Kabili Natile, “Taata wamu Myulu...”

²³ Tekutila tuleipusha pafisungusho. Baibele itila, “Iyanaka kabili inkulo yabucende ilefwaya ifisungusho.” Kabili tatufwaya ifisungusho, lelo Lesa alabomba ifisungusho. Panshita imo ine iyo Alandile ico, Alepanga ifisungusho. Lelo—lelo nga cakutila ifwe twafifwaya, tufwile twakwata ifisungusho, icintu cimo icakutulangisha, icakushininkisha cimo ukutila—ukutila twalipusuka, nangu icintu cimo ngeco; Nshacetekela icishininkisho. Ndecetekela icishininkisho icakutila twalipusuka, twalisendele Lesa pa Cebo Cakwe. Ico e cintu icawamisha ico Naishiba. Kabili lyena ifisabo filakonkapo.

²⁴ Nomba, Nali Mwipwishe nga cakutila kuti Acisuminisha, ukuba nge—nge cilangililo icakuti inshita yakubwekelamo ku Africa naifika; ifyo, ukulanshanya kwile kulekoselako inshita yonse. Kabili ilyo twapepele ulyo mukashana, atampile ukulanda nokumfwa nokusela. Cena cali fye icawamisha ukumona ifyo Shikulwifwe engacita.

25 Kabili eico tuli abansansa munshita ino iyabushiku pali ico, pakwishiba ukuti ilya ing'anda iisuma, konse uko yabela, tuli uwansansa nganshi muno bushiku pakumona ulya umukashana. Bushe cacitike shani, ilyo imishipeshipe yonse yaliputwilweko kuli cena? Mwamona? Takwali nshila, nakalya. Iyo, nangu imo. Waliputwike nokuifumyapo, umushipa wakululimi nangu ukulanda na mukumfwa. Icili, fyena fyonse fibili fyali pa mushipa umo wine, lelo walyonawilwe kubusanso. Lelo, Lesa, mu musango umo wine. . .

26 Nibanga abaliko kulya nokumfwa umukashana alelanda? Natumone apa. Ico nacilungama. Kabili alelanda nokumfwa nokulanda.

Ine kuti nalanda nga *ifi*. Natile, "Bushe namung'umfwa?"

Atile, "Ee."

"Wang'umfwa nakabili?" Natile, "Tila, 'Mayo.'"

Atile, "Mayo."

Natile, "Tila, 'Yesu.'"

Atile, "Yesu," nokutwalililapofye nokulanda.

27 Eico, Shikulu musuma bushe Teifyo? Alisulamo uluse.

28 Kabili nomba nshabapo mukulongana kwakundapa nomba pamilungu ibili, calilenga umutima wandi uletunta bwino nakabili, ukuba uwaipekanya kukulongana nakumbi.

29 Nomba, mulya mwi Buuku lya Mpendwa. Nalitemwa Icipingo ca Kale. Kabili ifwe tuli nokukwata isambililo muno bushiku, pali nomba Ibuuku lya Mpendwa. Impendwa, chapitala 13 kabili na vesi ya 30, twalabelengafye vesi imo iyakuba ishintililo, neyakutendekelapo.

30 Kabili nomba, mwamona, nga cakutila twabelenga vesi imo ukufuma muli Baibele. . . Nalishiba ici cintu cimo: icebo candi cikafilwa, pantu Ndi muntu. Lelo ico Cebo cakwa Lesa tacakatale acifilwa, pantu Cena Cebo cakwa Lesa. Kabili, eico, vesi imo ukufuma Pano yalapela umufula uwalinga icakuti umuntu onse uleisa engapalwa, pantu nacicilapo pakubelengafye i Cebo.

Nomba, mu versi 30:

*Kabili Kalebu atalalike abantu abali pacinso cakwa
Mose, nokutila, Natuleya nomba line, nokuyacipoka;
pantu tuli aba. . .kuti twacicimfya cena.*

31 Kabili lekeni Shikulu alunde amapalo Yakwe ku Cebo. Nomba, isambililo lyandi muno bushiku ni: *Pa Kadeshi-Barnea*. Kabili ili isambililo ilyo tukwete mukutontonkanyapo, ukubikafye umufula pamashiwi yacitike kunuma, ukuti yatulete pancende apo, nga Shikulu nga asuminisha. . .

32 Fyonse ifi, mucine, tafikalilwapo. Cilandwafye ukupitila mukuputwamo, nga fintu fye filepelwa. Nshayapo ku sukulu

ukusambilila ifyakushimikila. Kabili Nalyesha ico, imiku ine nangu isano, kabili icine cine nalipanga icimfulunganya icabipa ukufuma muli ico. Nshi—Nshishibefye ifyakucita ifyo. Lelo, Nali Mutemwa, kabili Nshintilila pali Ena. Kabili Nalishiba ukutula imwe bonse mwalimutemwa, pamo.

³³ Eico, nomba, mukutendeka, ici cikope, ico Lesa... Icacucitika icikalamba icamu Baibele, ico Lesa abtubikila mumutande, ukutula ukupitila muli ici kuti twanonka. Ndecetekela, mulya mu Ba Hebere chapitala 10, nangu chapitala 12, atile, “Ukumona ukutula ifwe natushingulukwa ne kumbi ilikalamba ilya nte, lekeni tubike lubali conse icafina, kabili nolubembu ulu ulutucululusha, pakutula twinga butuka ulubilo ulwabikwa kuntanshi yesu nokushipikisha, ukuloleshafye kuli kalemba kabili kapwisha wa cicetekelo cesu, Shikulu Yesu Kristu.”

³⁴ Nomba, conse i Cipangano ca Kale, kabili nayonse imibele ya Ciko nemibele, cali fye icinshingwa cakutangilila ica—icakwikatilako, nangu ilibwe ilikankala, Icipangano Cipyā, icailundile kumalango na ino inshita pamo. Abantu abengi basontelela kuli ino nga inshita ya bwina Kristu, lelo teyo. Ino ni nshita ya Mupashi wa Mushilo. Inshita ya bena Kristu yapwile imyaka itatu nemyeshi itatu. Amalango yapwile imyaka imyanda cine lubali. Kabili nomba inshita ya bena Kristu eyali umulalo, nangu ukuba inshita iikankala, pa Cipyā ne Cipangano ca Kale pamo.

³⁵ Kabili inshita ishingi, mulya muli Baibele, tulamona, kabili inshita ishingi cisontelela ku, “Milimo ya Batumwa,” efyo itwa. Lyonse nalitemwa ukusontelela kuli cena nga “Imilimo ya Mupashi wa Mushilo mu Batumwa.” Pantu, abatumwa bali fye abantu, lelo cali Mupashi wa Mushilo mu batumwa, ukuleta ukusela kwa Uko. Kabili Mupashi wa Mushilo e Mupashi wakwa Shikulu Yesu Kristu uyo uwaikila pa Chalichi, ukutwalilila imilimo yakwa Shikulu Yesu, mukuya Kwakwe. Caba ukupela u Lubuuto lwa Mbila nsuma, mu lubuuto ulunono, ukucila ifyo cali ilyo Kristu aali pano.

³⁶ Kwati mweshi na kasuba. Umweshi ulema ukuleta ulubuto panshita takuba akasuba mpaka katula nakabili, elyo umweshi wafumapo. Kabili akasuba kaliba ulubuuto lwacilapo, icakuti kalashimya ulubuuto lwa mweshi. Nomba ulubuuto lwa mweshi nicinshi? Kasuba kalangishiwa pamweshi.

³⁷ Kabili ico caba nga Kristu. Ilyo Aali pano, Aali u Lubuuto lwe sonde. Alile, nokubalika ukubwelela pa Chalichi Cakwe, ukulangisha u Lubuuto Lwakwe mwisonde ileelo, u Lubuuto ulwakwendamo mpaka Akabwele. Kabili nomba fyonse muli-fyonse fikapelwa kuli Ena. Kabili Akekala pa cipuna ca Mfumu Davidi, nokuteka inshiku pe nenshiku pe.

³⁸ Nomba, Icipangano ca Kale pakuba icipasho icisuma, tulecipashanya kulya nokumona filya fintu filecitika ku bantu, icakuti tumone ifyakumwenako.

³⁹ Nomba, Lesa ukuba uwakuiteka...Kabili ilyo Nacilasambilishafye ileelo mung'anda umo ba Njitile ku cakulya ca cungulo. Balefwaya ukwishiba nga kuti baishiba abatemwikwa babo ilyo babakumanya mu Bukata.

⁴⁰ "Mulandu nshi," Natile, "icine cine, tuli nokubeshiba." Mwamona, ifwe—ifwe twaba mu... .

⁴¹ Twakwata imibili itatu iyapusana pusana iyo twikalamo: Umo muntunse, umbi wa mu mulu, kabili umbi wa bukata. Kabili nomba nga cakutula twaishiba umo nomunankwe mumubili wamuntu, umubili uufwa, cicilepo ifyo tukeshiba, cila muntu mumubili uwabukata!

⁴² Cali nga cakuti amalango kuti yaleta icintu icisuma, cicilepo icintu icisuma ifyo ukusenamina kwingaleta, pantu ikulu ukucila amalango!

⁴³ Nga cakuti umweshi kuti wapanga icipandwa ca lubuuto, cicilepo ifyo akasuba kakacilapo ukusanika ilyo kaisa! Kabili ifwe mucine tuli nokwishibana umo no mubiye.

⁴⁴ Kabili nomba caba fye kwati, ngefyo Nanda, ifwe tulatwalilila mukwishiba, umuntunse. Walishiba ifingi nomba ukucila ifyo waishile ilyo wali umulumendo umunono nangu umukashana, pantu uleya ulekwatilako amano. Kabili umutundu wa muntu onse uleya ulekwatilako amano. Lelo, bushe mwalimona, ubufumu bwa nama tabuya bulekwatilako amano ayali yonse? Namwishiba, mwikala mung'anda iyawamapo ukucila iyo bawishikulunwe baikele. Kabili nalimo abana benu bali nokwikala mu ng'anda iyawamisha ukucila iyo mwakwata nomba.

⁴⁵ Lelo ili line fye, Ndecetekela, mu *Fyakubelenga Ifyalembwa* nangu icifulo cimo, Nalebelenga icalembwa apo basendele akacuni akanono, nokukabika muli kasalanga, ukwabula ukwakupangila icinsa. Kabili kalebikila amani panshi pali kasalanga. Kabili yalitotele utuni utunono. Kabili balitubulile utuni tunono nokutubika muli kasalanga, ukwabula apakulila icinsa. Ilyo batutotele, ku nkulo ikumi limo na shisano, inkulo ikumi limo na shisano ishalekana lekana, ukumona nga cakutula kuti twacinja icifyalilwa. Nomba, ico kuti casenda imyaka ikumi limo naisano, pantu amenshi yakwatafye icinsa cimo ica mani mumwaka. Panuma yamyaka ikumi limo na isano, balilekeleko kalya koni akanono, patwakonkelepo, pa—pamyaka ikumi limo na isano, tatwatalile atukwata ifyani ifyakukulilako icinsa, nangu icintu cimo; nokubika aka koni akanono muncende, kabili icantanshi ico kacitile kuya kula icinsa. Ifyuni fikula ifinsa fyafiko nga fintu bacitile mwibala lya Edeni.

⁴⁶ Lelo umuntu atwalililapofye ukuya kuntanshi, baya balekwatilako amano. Onse . . . Ba sokulu, nga fintu Nalandile, baleya mukumona banokokulu, mucikotikala. Ba wiso balile mukumona ba noko, baleensha kabalwe ne celeta. Naile mukumona umukashi wandi, muli T Ford. Umwana wandi umwaume alikwata motoka yamaka cine konse kone iibutuka, fyonse ifyo muita. Nalimo abeshikulu babo bakakwata indeke iibutuka.

⁴⁷ Uyo e musango, tuletwalilila ukulunduluka, pantu twalikwata umweo. Nomba, icuni tacakwata umweo. Lelo twalikwata umweo. Ifwe tatuli kabumba; lelo kuti twapilibula bubi bubi. Nomba, tekuti tupange ifimuti; lelo kuti twabula ifimuti, panuma Lesa apanga, nokupanga ing'anda ukufuma muli cena. Pantu, tuli bana bakwa Lesa, abana baume na bana banakashi bakwa Lesa. Te mulandu ifyo twawa, nalyo line tulingile ukwishiba ukutula tuli bana baume nabana banakashi bakwa Lesa. Mumibele yesu iyapona, ifwe tucili abana baume nabana banakashi.

⁴⁸ Lesa apanga ubulayo; Lesa alingile ukusunga bulya bulayo. Oh, Ndesubila mwacimona ico. Nga imwe kuti mwaumfwafye, mwe chalichi, muno bushiku, nokwiluka, tekuti uleya ukufuma kucipilala ukuya kuluceshi, nokuilunda kuli chalichi *ici* naku chalichi *ico*. Iwe tekuti mufwaye ukukonka ifintu fya mwisonde, ukuleta ukusangalala kuli iwe. Tekuti ulefwaya ukufuma kuli umo umusonkana wakundapa ukuya kuli kumbi. Kuti wacetekela Lesa pa Cebo Cakwe, nokwishiba ukutula cena nacipwa. Mucine. Ilyo Lesa apela ubulayo, Ena tekuti afume kuli bulya bulayo. Ena aali—Ena aali no mulimo uwakusunga i Cebo Cakwe.

⁴⁹ Naumfwile umuntu umo aletila ukuba, bena—bena kuti babwelela kunuma, kabili abwela, kabili kuti wacita ico. “Ukuba, Nalilusa ububile na Lesa.” Nga walitala ausangwa pamo Nankwe, tawakatale lusa ububile Nankwe, pantu Lesa tekuti akupusushe kabili apilibula inuma Yakwe pali iwe nokukutamfya. Nga kuti Acita ico ninshi Aonaula ubwiminishi Bwakwe. Eico, Ena tekuti acite ico. Eico lintu Lesa . . .

⁵⁰ Tuya tulekwatilako amano, lelo Lesa takwata intendekelo nempela pakutampa. Aali uwapwililika. Taya alekwatilako amano. Ena lyonse aba fye cimo cine. Eico, nga cakuti ubwafya bumo bwaisa, na Lesa acitile *ici-na-ici* munshila iyo mubwafya. nomba nga cakutula ubwafya bumo bwine bwaima nakabili, nga cakutula Tabombele mu musango umo wine, Abombele mucilubo lintu Acitile *apa*. Mwamona? Eico Alingile ukuba cimo cine, inshita fye yonse, te mulandu wa nshita ili yonse.

⁵¹ Kabili na bantu efyo balondolola nokwesha ukufumyapo Amaka ya Bulesa, Nda filwa ukufumkisha *ici*. Pantu, nga cakutula Kristu aba cimo cine mailo, ileelo, ne nshiku pe, Amaka

Yakwe yaba cimo cine, imicitile Yakwe yaba cimo cine. Kabili nga fintu Aali lilya, efyo Aba nomba, kabili efyo akaba inshiku pe. Tekuti cifumye icntu icili conse kuli Ena. Ifyo efyo.

⁵² Kabili nga cakutilla Alimine munshiku sha bulendo Bwakwe ubwa mwisonde, nokuposha abalwele abo ba dokota bafililwe ukutensha, no kubondapa; nga Abombebe muli ulyo musango muli bulyo bwafya, nga Aba cimo cine mailo, ileelo, no muyayaya, Alingile ukubomba mumusango umo wine ileelo, nga teifyo ninshi Alicitile icilubo kuli balya bantu. Mwamona?

⁵³ Nga Alipangile ubulayo kulya, kabili alingile ukwikala nabo, Alapanga ubulayo *pamo*, Alingile ukwikala nabo. Afwile ukucita ico. Tapaba nangu cimo icalubana na Lesa, pamo nobulayo Bwakwe. Icilubo caba muli ifwe, tecicetekelo icakucetekela ico, nangu uku Musenda pa Cebo Cakwe.

⁵⁴ Nomba, mwamona, umukosha wa cuni, kuti twacita nga fintu ficita mukubalilpo.

⁵⁵ Lelo, tulesa mukuba abamano, tulalondolola ukufumyapo i Cebo conse, kabili twatila, “oh, cali canshiku shapita,” kabili twakula umubele umbi. Mucifulo cakusenda Lesa pa Cebo Cakwe, ifwe tutampafye akabungwe akapya. Mwamona? “Ukuba, *uyu* e musango Lesa ali nokucicitilamo, kabili *uyu* e musango Lesa ali nokucta ico.”

⁵⁶ Nga cakuti ifwe, kwati fyuni, kabili tatwalecinja, kabili tatwakwete ukuisalila, ifwe kuti twacetekelafye Lesa pa Cebo Cakwe, kabili ico kuti capwisha ico, kabili epela. “Lesa efyo asosa, eico ico fye ceka ecabako kuli cena.” Ifyo cawama, ukusanga ukutilla uwacine kabili Lesa uwa mweo acilipo ileelo. Mukati ka cimfulumfulu conse, nalyo line Lesa ali uwa mweo nokuteka.

⁵⁷ Nomba, aba bantu ba cipangano, Israelie mulya mu—mu Egypto, pa mulandu wakukana nakila, nokushitisha munyinabo Yosefe. Kabili asendelwe ukuya mu Egypto, kabili ali kulya imyaka imyanda ine, muli bunkole. Ndefwaya imwe mumone, tabatalile abalufya icipangano cabo. Balufishe ubuntungwa bwabo, te cipangano cabo. Lintu Lesa apangile icipangano pamo na Abrahamu, Isaki, na Yakobo, ukutilla Alapile pa Mwine ukutilla Akapususha Abrahamu nolubuto lwakwe ulukamukonkapo, Lesa aali no mulimo ubwakusunga bulya bulayo.

⁵⁸ Kabili Ena ali fye no mulimo kuli imwe, pali bulya bulayo, ngefyo Ali kuli Abrahamu, pa bulayo. Ico nacilungama, nga cakutilla iwe uli Lubuto lwakwa Abrahamu. Kutu waba shani ulubuto lwakwa Abrahamu? “Ifwe fwebafwila muli Kristu tulasenda u Lubuto lwakwa Abrahamu,” efyo Baibele yalanda, “kabili tuli mpyani umwabela ubulayo,” lyena Lesa aba fye no mulimo kuli imwe ngefyo Aali kuli Abrahamu. Ukutilla, ici kuti

cafumya umwenso onse muli cena! Lesa talefwaya imwe ukuba no mwenso pa cintu icili conse. Shintililenifye pafyo Alandile.

⁵⁹ Ifyo tulefwaikwa ileelo muntu umo uwinga becanya na ora iyo twikalamo. Ico nacilungama. Mubushiku ilyo icaibela nefintu fyonse fingilemo, ukupitila mwishina lya bukapepa nafimbipo, na mwishina lye pusukilo, i Mbila nsuma, tulekabila umuntu umo uwakushiwa pakati kesu, nga fintu Lesa aimishe Mose ukubula icifulo muli bulya bushiku. Ee.

⁶⁰ Tabalufishe icipangano cabo. Balilufishe ubuntungwa bwabo. Bali abasha, lelo umulapo waliminine.

⁶¹ Kabili ubushiku bumo kulya, ilyo baleteta nokulila, pesamba lyabalebabomfya ku Egypto, pantu baishileba abasha. Ndefwaya mumone ici cikope cawama. Kabili ici kuti caba icawama ku bakonka amafunde. Kutikeni. Lesa taishile nokutila, “Nomba, nga cakutila kuti wacita icintu *cimo*. Nga cakutila kuti wacita icintu *cimo*.” Ukusenamina kwakwa Lesa kwapele kapususha, Mose. Ico nacilungama. Te mumibele iili yonse Mose aletelwemo, lelo kukusenamina ukwapulamo, Lesa atumine Mose. Te mulubushi fye, lelo ukusenamina kwaletele kapususha; ukwabula ifunde iili yonse, ukwabula icili conse. Ukusenamina fye ukwabufuma cumi ukwakwa Lesa, Atumine Mose ukuba ka—kapususha kabili kapususha wa calo, ukubafumyamo.

⁶² Lintu Natontonkanya pali ico, ninshi Natampa ukwibukisha ukutila Lesa umo wine, uwali nabantu ba cipangano mu Egypto, mucine... Pesamba yakutitikishiwa nabucaibela ubo ichalichi calimo muno nshita yabushiku, Akatuma, ukupitila mukusenamina mu Buntu Bwakwe umwine, kapususha. Tuli abashininkishafye ukuti tukakwata ukupongololwa kwa Mupashi wa Mushilo, munshiku shakulekelesha, ilyo twisele mu chalichi muno nshita yabushiku. Lesa nabombelaa pa bantu ba cipangano, ukwabula ukubomba kwabo nangu kumo. Lelo, Atumine ukwabula umutengo ukufuma ku Muulu, ku bantu Bakwe abacipangano, imicitile yakusenamina. Pa kupulamo ukwa bulayo Bwakwe, Atumine Mose.

⁶³ Kabili mubwafya bumo bwine, ilyo abantu bali muli bunkole, namukati kafintu fyonse, ikoli lya lubembu, namalwele nobwafya ileelo; Ali fye uwashininkisha ukutuma Yesu Kristu umuku wacibili, ngefyo Atumine Mose umuku wa ntanshi. Ilyo ubwafya bwaimine, Lesa abombele mukusenamina kwa kuiteka. Alingile ukucita icintu *cimo* cine mu mulimo umo wine, nangu Alicitile icilubo ilyo Abombele kunuma kulya. Mwachimona ico?

⁶⁴ Ico Ndepilibula nici. Ulubembu ulwakulishapo ulo Nasanga mu Chalichi ileelo kukana cetekela. E lubembu lwabapofye. Takwaba ulubembu lumbi kanofye ukukana cetekela. Muli ici ubushiku buli pesa, cipandwa nshi cifitile? Tekuti mulande

ukutula, “*Apa epafitile,*” ilyo ukufuma kumaboko yandi konse nakufita.

⁶⁵ Nomba kwabafye inshila imo iyakubika mumabumba nangu ukulanda ifyo ulubembu lwaba. Ico tekutula ulanwa, nangu ukupeepa, nangu ukuteya injuka. Capangwa mili *iyi* nshila: pantu tawacetekela uli mubembu, efyo ucitila ico. Kabili ico cishinka. Pantu ulateya injuka, pantu ulabepa, pantu uleba, ifyo ifintu telubembu. Ifyo efifumamo mulubembu. Ico nipa mulandu wakutula muli iwe mwaikala umupashi uwapusanako. Nga cakuti walicetekela, uwacetekela uwakosa, ifyo fintu kuti fyaba ifyafwa kabili ifyafita nga fintu ubushiku buba kucinso cobe. Mucine. Mwamona? Ifyo fintu mibele yakukana cetekela.

⁶⁶ Muli Yohane Washila chapitala 3, Yesu atile, ukuti, “Uyo uushacetekela alisekwa kale.” Taufika napakutampila. Uli uwasekwa, pakutampa.

⁶⁷ Eico, tacilepilibula ukutula ufwile wakwata akamuti kakupiminako mu chalichi cenu, “Nga mwacita *ici*; nga mwapima kuli *aya* mafunde; nga mwapima kuli *lilya* ifunde.” Inshita ishngi, abantu bali nokubika pambali ifintu ifinono ifyaba ngefyo, icakuti ailunde ku chalichi; kabili icintu cicili mumutima wabo, kabili balaya nokucita ico. Lelo ilyo umuntu akumanisha ifyo Lesa afwaya, kabili afyalwa cipya cipya ku Mupashi wakwa Lesa, filya fintu filafumishiwapo mu mweo wakwe. Tafwaya ukuficita.

⁶⁸ Kuti mwaingililamo inkumba? Inkumba ikaya kumupili wamufundo, kabili ili nokulya. Nshi—Nshileipela umulandu. Ninkumba. Ico e cilenga yena ukucita ifyo. Lelo tekuti mumone umwana wa mpaanga ukucita ico. Pantu, kwaba ififyalilwa fibili. Inkumba yalikwata icifyalilwa cimo, kabili umwana wa mpaanga alikwata icifyalilwa cimbi. Kabili apofye iwe kuti wasunga ilya imibele imoine muli ilya inkumba, temulandu nefyo wingaasha ukuiwamya, yena ikaba necifyalilwa cimo cine pantu ninkumba, icakubalilapo.

⁶⁹ Kabili eico nomba, inshita ishngi, tulasenda abantu nokubaleta mu chalichi, nafimbipo ngefyo, ukubapanga ba membala, nangu tabatala abapusuka.

⁷⁰ E mulandu wine ileelo, kwabela ukufulunganishiwa, nga fintu abantu, tabaishiba inshila iyakuyamo. Bamonu abantu balelanda ukutula bena Kristu, lelo tabapusana ne sonde. Mulandu wakutula uyu muntu tatala kumanyapo, nangu ukufyalwa cipya cipya, tatalile pokelela Shikulu Yesu, tatalile cetekela pali Ena. Limbi balibombeshe. Limbi balishanine. Limbi balibilikishe. Limbi balilandile mu ndimi. Limbi balicitile fyonse ifi fintu, lelo tabatala isa ku Muntu, Kristu Yesu, kabili mucine ukufyalwa cipya cipya. Mu mitima yabo, ifi fintu filafwa, icifyalilwa cilapilibulwa, kabili umuntu mupya alifyalwa.

⁷¹ Nomba, ilyo Mose akulile, alikene ukwitwa umwana mwaume wa mwana mwanakashi wakwa Farao. Panuma yaico aipeye umwina Egypto. Lelo Lesa ali pamo naena kulya ku Midia, nokumubwisha. Kabili mucinso cacilya icimpusa calepya, bulya bushiku, apokelele icakupitamo ico caikele nankwe ilyo lyonse aali nomweo. Kabili ngefyo na mailo Nalandile ubushiku, eico Ndelanda ileelo, ukutila umuntu. . . te mulandu ifyo Mose asambilishiwe bwino, ubwingi bwa masambililo yafya mipepele ifyo aishibe, ifyo aali membala wamu chalichi umusuma. Kabili akwete kafundisha umusuma, nyina. Akushiwe pesamaba yacintu icingetwa amasambililo icingaletwa. Aali umwana mwaume uwamfumu. Lelo acili, aleesha palwakwe umwine, afililwe ukucipwisha. Lelo muli ba miniti basano mu Kubapo ukwa cimpusa icalepya, aishileba umuntu umupya. Icintu cimo calicitike.

⁷² Kabili ico tulekabila ileelo, muma seminali yesu, temasambililo yamipepele iyalesambilishiwa, lelo cakupitamo icacimpusa icalepya, uko abaume bafukama mucinso cakwa Lesa noku Mukumanya icinso ne cinso. Tulekabila uwakubeca ileelo nga fintu twakwete muli bulya bushiku. Ico tulekabila baume na banakashi abakumanya Lesa, kabili balishiba ico balelandapo. Te muntu umo ukwisha ukusambilisha ukufuma mwi buuku limo ilya chalichi cimo, nangu yamo amasambililo ayafya mipepele. Ico tulekabila ileelo, muntu uyo uwaba mukubapo kwa cimpusa icalepya, uwafyalwa cipya cipya, kabili alipilibuka kabili alisanguka icibumbwa cipya. Uyo e musango wa muntu tulekabila ileelo. Uyo musango wamuntu uwingekala pamulongo wakulashilapo, temulandu pafyakwifisa nokuya.

⁷³ Mose, panuma yakupokelela umulimo wakwe, aile mulya mu Egypto nokupususha abana ba Israele. Icilubo cimo icikalamba ico tulesanga, kabili icintu cimo icikalamba. Nga fintu cali muli bulya ubushiku, eflyo cili ne leelo. Ilyo, tulesanga ukutila Mose aile kulya no kusenda abana ba Israele no kubafumya, icintu ica kupapusha calicitike.

⁷⁴ Nomba ici cili apa. Nshilefwaya ukumusunkanya nangu ukufwambulula inkanda ukufuma kuli imwe, lelo Ndefwaya ukushimikila Icine. Kuliko icintu cimo palwa ico, munyina, Icine tacakatale mulenga ukwishibikwa, lelo Icine cikamulenga ukuba aba bufumacumi. Ico cintu icisuma. Kabili tekuti ubepo uwabufuma cumi ukucila ukuba uwaishibikwa? Mucine kuti wafwayapo ukuba ifyo.

⁷⁵ Nomba, Ndefwaya mwishibe, ukutila, ilyo icintu icakupapusha cacitike, ifisungusho fyalicitike, ifishibilo nefipapwa. Kabili ilyo baile kunse, Baibele itila, "Ibumba ilyabacintobe ntobe lyalifumine," ibumba ilyasankanishiwa ilya bantu. Bamo muli bena, abacetekela; bamo, abaipashanya ukucetekela. I—ifisungusho ifikalamba fyalicitilwe. Abantu baile nga abaitunga ukucetekela, kabili bena tabali abacetekela.

⁷⁶ Kabili apo epo ibumba ilikalamba ilyabwafya bwesu lyaikala ileelo. Kuti twasontapo umunwe pali ico. Baume na banakashi abesa mu chalichi nokulumbula ukuba abacetekela, kabili te bacetekela. Nalicisanga mucintamba. Nalicisanga mumulongo wamapepo. Nalicisanga konse uko abaume besamo, nabanakashi, abatile, “Nalicetekela,” kabili balanda ukutila balicetekela, kabili tabacetekela.

⁷⁷ Kabili ico ecatendeke ubwafya mu Israele. Lintu bafikile pa ncende, iyakutila basangile aba bantu balifumine. Icine cine, ica maka yakalamba calicitilwe.

⁷⁸ Ifyo eflyo tusanga mumibele yesu ileelo, muma chalichi yesu, Lesa alisa pancende. Alondapa abalwele. Alibusha abafwa. Alisula amenso ya mpofu. Alalenga bankoma matwi ukumfwa, bacibulu ukulanda. Alondapa ifilema. Alafumyapo ipwalonda pa bantu. Ifwe...Ico tekuti cikanwe. Ico ni mumakana. Kabili inshita imo catendeke, ukufuma pano pene pa musebo uwa Eighth na Penn Street, kabili nomba ukushinguluka icalo nemililo iyakupuputulwa amakana ikumi limo ilepya pafyulu fyacalo conse icisenshi nakonse kumbi. Ifishibilo ne fisungusho filecitwa. Ifintu ifikalamba fileenda. Lesa aleenda! Tuli panshita yakumpela, inshita yamampatu.

⁷⁹ Eico tulesanga ukutila, muli ici, muya bacintobe ntobe. Inshita ishing, abantu bakwa Lesa batila, “Ee, Naba ici. Ndi nokucita *ici*.” Kabili twasanga ukutila abo bantu bali ababumubili. Lilya fye ukutitikisha ukunono kwaisa, bakabile ukubwelelamo mu Egypto. Balefwaya impoto sha galiki. Balefwaya isabi ukufuma mu mumana. Balefwaya kanyense na galiki. Balefwaya ifintu ifyo bakwete mulya mu Egypto.

⁸⁰ Ico cisuma kabili icapwililika icipasho cakwa membala wa chalichi ileelo. Alitemwa ifintu fya mwisonde pantu te wakwa Lesa. Baibele itila, “Nga mwatemwa isonde nangu ifintu fya mwisonde, ukutemwa kwa kwa Lesa takwaba muli imwe.” Kabili Kristu aba fye mukulanda Kwakwe konse. Kabili ico cishinka. Kabili ileelo tulesanga abantu balefuma...

⁸¹ Oh, ifyo Ningakabila Lesa, munshila imo, nga kuti abika ici kulubali lwakukuso, pesamba lya lubafu ulwa busano, nokucitikisha panshi. Umuntu, temulandu ifyo waesha ukuifungusha, nga kwaba ukutitikisha, umuntu ali nokulangisha ifyo aba ifyawamishapo nefyabipishapo pesamba yakutitikishiwa. Nga wabula umwina Kristu panshita imo, kabili wamupisha mukutitikisha nokumona ifyo alecita, kabili kuti waishiba eflyo apangwa nafyo. Umuntu onse kuti aba umusuma, umuntu onse kuti alumbanya Shikulu, ilyo Mupashi wa Mushilo alepona mulukuta lwabantu; lelo lekeni ubwafya bwise, kabili mumone icalacitika, moneni icalacitika nomba. Nomba, ulepona ukupilibuka? Bushe uli umo pali bacintobe ntobe? Bushe uli muntu uushinga, nga fintu ukulanda

kwamumusebo kutila, “Uushinga shipikisha naco”? Ifyo eflyo, Tekuti ushipikishe palwa ico. Munyina, nga wakwata iyo mibele, iyakubwelelenuma nokuya pamulu-na-panshi, na mukati-na-kunse, mulandu nshi tawingeshila ku Kalbale nokufwa kufyobe, nokufyalwa cipya cipya ku Mupashi wakwa Lesa? Amen. Cansoni kuli imwe; imwe mwebalanda ubwina Kristu, imwe mwebaikala muma chalichi yenu.

⁸² Tatwakwata ba membala muno. Mwisafye kuno. Mwaba muma chalichi yonse ayapusana pusana.

⁸³ Lelo, mwebantu mwebalanda ukutula muli bena Kristu, kabili nombamba mwikala icintu cimo kunse ico tamwaba, mwaliba nenkongole kwibumba lyakwa Shikulu Yesu Kristu. Amen. Mwebalanda ukuti muli bena Kristu, kabili mulaba nensoni uku Mucetekela pa Cebo Cakwe, nangu ukupela ubunte ku Maka Yakwe nobukata, panshita iili yonse, iwe uli wankongole kwi Shina lyakwa Shikulu Yesu Kristu. Amen. Ico cishinka. Ico nacilungama. Iminina ku Cebo. Ibila nangu ukunwena, iminina pa Cebo Cakwe.

⁸⁴ Abrahamu alicitile ico, nokwita filya fintu ifishalipo, kwati epo fyali. Kabili acetekela Lesa, kabili capendelwe kuli ena kubulungami.

⁸⁵ Ifyo tulekabila ileelo kufumyapo ifupa lyakukabila, nokubikapo umongololo mubwina Kristu. Epo caba. Icintu ico tulekabila ni bamo abena Kristu abafyalwa cipya cipya, abaume na banakashi, abaka, ilyo bamona ubwafya bwaima, tekushelela, tekupona ukufumapo, tekubutuka ukuya muli *iyi* nshila, lelo umwaume nangu umwanakashi uuli nokwiminina nokulangisha amalangi yabo. Nabanobe bali nokukutasha ukucilapo nga kuti wacita ico.

⁸⁶ Mwaume nshi uushitasha namayo? Leka abe umubi ngo lupango lwapangwa namatipa babikapo naba tombolilo. Leken. abe umubi nga fintu engabipa, lelo leken. abe namayo uwamibele iisuma iyakwimininako imibele isuma iyakwa namayo. Tamwaba umwaume, mucalo, uushingafulako icisote kuli ena, nga alikwatapo ubwaume nangu bumo muli ena.

⁸⁷ Kabili ngo muntu alolesha ico, pakuba umwana wakwa Lesa uwawa, bushe Lesa Umwine akatontonkanya pa muntu uukeminina pafyo ashininkisha, ukwita icalungama “icalungama,” necalubana “icalubana.” Ico tulekabila ileelo nikulya ukusuma ukwa munshita yakale, ukupuputulwa kwa Washila Paulo, kabili na Baibele ya Mupashi wa Mushilo ukubwelela mu chalichi nakabili.

⁸⁸ Mwaliba ifingi nganshi ifyafye ifyakucita, mwishina lya bwina Kristu, ukubufumyapo, ubwingi bucilonganino, ubwingi bukasambilila bwamipepele, amasambililo ayengi nganshi. Kabili Nshilesha ukutungilila... Abantu tabenda, nangu cibe ifyo, abalemana ngeflyo ichalichi cili. Ici cili apa. Ukulemana

ngefyo ichalichi cili, amasambililo te nkonto yobe. Icicetekelo cobe e nkonto yobe. Amen. Cisuma. Amasambililo tayakatale cita ico. Icilonanganino tacakatale cita ico. Takwakatale akuba akabungwe akakapyana pacakupitamo ica mumuputule wapamulu. Takwakatale akuba isukulu ilikapyana pacifulo ca Pentecosti. Tekuti kube. “Te kumaka, tekubulamba, lelo ku Mupashi Wandi, efya sosa Shikulu.” Ifyo efyo tulefwaya ileelo, ukubwekela kucakupitamo icamuli Baibele. Abena Kristu abafyalwa cipya cipya, kabili balisambwa mu Mulopa wa Mwana wa mpaanga, abapangwa ababuuta, abapangwa cipya cipya, abafyalwa imiku ibili. Ico isonde lilekabila ileelo: ukupuputulwa, ukupuputulwa kwa munshita yakale, umusango untu Paulo Washila akwete mu A.D. 66.

⁸⁹ Nomba, munyinane, nkashi, tulemona ili bumba ilyasakana lileya. Panuma yakashita, batampa ukuilishanya.

⁹⁰ Ico eco tusanga mukusela konse ukwakwa Lesa. Ico eco imwe ba Methodist musanga muchalichi cenu. Ifyo efyo imwe ba Baptist musanga mu chalichi cenu; imwe ba Presbyteriani, ba Pentecosti, onse untu imwe mwaba. Mulabasanga. Libumba lyabasakana. Ifyo efyo lyali. Lintu John Wesley akwete ukupuputulwa, kulya kunuma mu myaka ikana limo ne myanda cine lubali, ibumba ilyasakana lyaingilemo. Lintu Martin Luther akwete ukupuputulwa, kwali ibumba ilyaba cintobe ntobe ilyaimine. Ilyo ba Baptisti, ukupitila muli John Smith bakwete ukupuputulwa, bacintobe ntobe balimine. Ilyo ba Pentecosti bakwete ukupuputulwa, ibumba lyaba cintobe ntobe lyalimine. Kabili ico ecishinka fye. Aciba abene bene, abacine, abacishinka, nga balikele mu chalichi, nga balipepele aba bambi bafuma, nokutwalilila. Nga mucili ukupuputulwa mu Methodist, mu Baptisti, mu Presbyteriani, namu chalichi ca Pentecosti. Lyena libumba lyabu cintobe ntobe.

⁹¹ Balifumine baya. Lilya linefye bafikile kulya, batampile ukuilishanya. Bali fye mumatololo imyeshi fye itatu, batendeke ukutila, “Oh, nga Nalikweteko galiki! Nga Nalikwetekofye kanyense!” Bena bali kunse kulya, kabili bapyanishepo galiki pa cakulya caba Malaika kuli galiki, kabili bena baleilishanya. Mulandu nshi? Amala yabo yalefilwa ukugaya (ukucita ico) ifyakulya fyaba Malaika.

⁹² Ubo e bwaba ubwafya ileelo. Ifwe tatwakwatapo ukupuputulwa ukwa nshita yakale iya Mupashi wa Mushilo, kabili namala yesu yalafilwa ukugaya ukwacine, ukusuma, ukwama fashoni yakale ukwa Mupashi wa Mushilo, ukupuputulwa ukwakwikatila. Ukuti tupole; tulekabila ifyalondololwa ifya ba Dokota, ifyo fyakulondololwa ifya kwa dokota Yesu, ifyakutulenga ukuba abalungama. Mucine.

⁹³ Tabekatilila. Balatwalilila; balabwekelamo. Akantu fye akanono nga kaima; balailishanya, balalanda landa, balalaka.

Babula...Chalichi icitampa icintu cimo, caba kwati lipwa londa. Likepaya ichalichi conse. Ico nacilungama. Tufwile twatampa ico nokucifumya.

⁹⁴ Nomba, ilyo tabalafika apatali...Nomba tontonkanyeni, balelya icakulya caba Malaika, caleika ukufuma ku Muulu, kabili bena baleilishanya. Kabili balenwa amenshi ukufuma mu Cilibwe icauminwe; ayapwililika, amenshi ya mushilo aya Mweo, kabili baleilishanya. Balefwaya amenshi yamatipa aya mu Nile.

⁹⁵ Efyo caba ne leelo! Abantu batila, “Oh, kashimikila, iwe walicepelwa amano. Ulafumya ubusuma bonse mu chalichi, ilyo washimikila ukususha *ifi* fintu fyaba ngefyo, na *ifyo* fintu ifyaba ngefyo.”

⁹⁶ Munyina, nga cakuti ichalichi cali epo citila epo caba, ileelo cena kuti catemwa ifintu fyakwa Lesa, nokupata ifintu fya mwisonde. Twalikwata ibumba lyaba cintobe ntobe, uyo e mulandu ileelo. Ibumba ilyabu cintobe ntobe, abantu abakabila ifintu fya mwisonde, kabili balefwaya nokwendako ne chalichi. Ico ecibalenga ukuipununa nokupona. Ico ecisala ukulongana kwa mapepo. Iyo e nshila, umwaba namabumba yabantu ayapusana pusana mu chalichi nokufumyapo icipailo pantanshi. Kabili umulilo yakwatafye nimu muputule wapanshi. Ico e ceba kashimikila ukushimika aya miniti ikumi limo na yasano, nokucipanga ukufuma mumakolona nefyuni fyakashika, nangu icintu cimo.

⁹⁷ Lelo, Ndemweba, i Chalichi cacyalwa cipya cipya icakwa Lesa uwa mweo cifwaya ukumfwa i Mbila nsuma. Pantu, umuntu uyo uwafyalwa ku Mupashi wakwa Lesa, Yesu atile ukutula i... “Umuntu tekukate weka akabela no mweo, lelo ku Cebo conse icifuma ku kanwa kakwa Lesa.” Mucine efyo caba.

⁹⁸ Amabumba yabacintobe ntobe! Balile. Ee. Balishile incende shabo ishakuitumika mu Egypto, baleitakisha mumano yabo ayapafyo bakwete, mumashini ayo bakwete, na sayansi yamiti, munshila baikele namamashini yabo. Baletakisha pafifulo fyabo. Balishile ifyo, ukuti babe pabulendo na Shing’anga mukalamba, kabili bacili baleilishanya.

Bushe ico tacili fye nge bumba ilya bacintobe ntobe ileelo?

⁹⁹ Kabili icintu cakubalilapo ico mwishibe, baishilefika pa cifulo icitwa Kadeshi-barnea. Kadeshi-barnea e cipuna ca bupingushi, cali cipuna ca bupingushi ice sonde. Ishina lyacine ilya ncende, ubupilibulo bwaico, bwali, “akamfuku mfuku akakalamba akakulu” akalefukauka pambali yafimuti fyangashe ifyali muciswebeye, uko utumayanda utunono, utwaleitwa umusumba, apakwikala icalo cabantu, nangu abantu abanono. Kabili monse mulya, utumana utunono twalefukauka konse konse, twalefuma muli aka kafukauka akakalamba akakulu.

¹⁰⁰ Wecikope icisuma we ica chalichi, mulya muciswebebe, uko ifintu fyonse fyaleisa ku Kadeshi mukusenda amenshi. Ifintu fyonse fyaleisa ku Kadeshi, mukusenda amenshi. Kabili eico nomba, akafukauka kamo akakalamba, nokutwala amenshi kutufukauka kambi. Ico e cipasho ica mu Muulu. Ico ecipasho ca cipuna ca bupingushi icakwa Lesa, eko ubupingushi butendekela mu ng'anda yakwa Lesa. Kabili uko aka kamo akafukauka kalefuma, natumbi utufukauka twalefuma muli kena, cipilibula, ukutula “u Muulu ukuba icipuna ca bupingushi icakwa Kristu, kabili nama chalichi yonse yalepelo mweo, amenshi, mu cipuna ca bupingushi,” konse uko abantu besa ku chalichi mukupingulwa.

¹⁰¹ Ubwafya bwa ico ni ubu, ileelo, abantu balesa ku chalichi kabili balabapampansha panuma, nefintu. Mulandu wakweba ati balalipila pambale yamusangulo; pantu balisa ba ba dikoni; pantu besa mukuba icintu cimbi, mu chalichi. Nangu, limbi, balensha motoka iyawamapo, nangu alafwala ifyakufwala ifisuma, nangu—nangu icintu cimo icaba ngefyo. Uko bamucindika noku bamupampansha panuma.

¹⁰² Munyina, ico tulekabila ileelo ni bakashimikila abakale abali nokwita icafita “icafita,” ne cabuta “icabuta.”

¹⁰³ Kwati ni Yohane Kabatisha, ilyo aishile ukufuma mu matololo yamu Yudea, talefwele bwino. Alefwala akapandwa ka mpapa ya mpaanga, nomushipi wampapa, naipomba insalu yangamali. Kabili aishile aleshimikila ukulapila. Kabili ilyo Herodi asendele umukashi wakwa munyina Filipi, kabili amupile, aishile kulya mukulongana. Kuti naelenganya dikoni aletila, “Wishimikila pa cupo nokulekana muno bushiku, pantu kuliko umuntu umukalamba pakati kesu muno bushiku. Wicita icintu nangu cimo ica ifyo.”

¹⁰⁴ Kabili bushe kuti mwaelenganya umuntu apokelela Mupashi wa Mushilo mwifumo lyakwa nyina, ukukana ukwikatilila kucintu icili conse ico cali ulubembu? Yohane Kabatisha apokelele Mupashi wa Mushilo imyeshi itatu ilyo talafyalwa. Alifwile, mwifumo lyakwa nyina. Ukulanda ukwakubalilapo pe Shina lyakwa Yesu, aimine nokutoloka mwifumo lyakwa nyina. Bushe kuti mwaelenganya umuntu uwapokelele u Mupashi wa lubatisho lwa Mupashi wa Mushilo, imyeshi itatu ilyo talafyalwa, ukuwikishanya nefintu ifya mwisonde?

¹⁰⁵ Aingilefye nokubika iminwe yakwe panshi yamona wakwe, nokutula, “Tacaba mwifunde iwe ukumukwata uyu.” Iyo e nshila. Bamuputwileko umutwe. Lelo umuntu uushifwa, muno nshita yabushiku, ali pamo nabalubulwa, mucalo cimbi. Amen. Ico tacalumbukwa, lelo Cine. Amen. Moneni!

¹⁰⁶ Mwiumfwa umwenso ilyo Natila, “ameni.” Cipilibula, “Cibe ifyo fine.” Ee. Ico nacilungama. Nomba, Ninjishiba ukutula Ndasansamukako panono, limo limo. Muletontonkanya uutila

Ninsamwa, lelo Nshisaminwe. Ninjishiba epo Ndi. Ninjishibafye bwino bwino epo Ndi, Ninjishiba eflyo ndelandapo. Ninjishiba Uo Ndelandapo; Shikulu Yesu Kristu. Moneni ifyo cawama!

¹⁰⁷ Kabili batendeke ukuibwabwasha nokuilishanya, kabili mukulekelesha baletelwe ku Kadeshi. Kabili lintu baishile ku Kadeshi, ici cipuna ca bupingushi, ubupingushi, nomba conse icintu cakolongene capamo.

¹⁰⁸ Kabili ubushiku bumo ubwa bukata, kabili Ndecetekela ubo bushiku buli mupepi ino ine nshita, ilyo kukaba ukupatukana pakati ka calungama ne cilubo. Kabili Ndecetekela kuti Nashininkisha mubwingi, ku nsambu sha mu Malembo, ukutila ululembo lwa ciswango ne Cikakatikilo cakwa Lesa, nangu abantu bakwa Lesa, fili nokucitika, naino nshita filecitika. Ululembo lwa ciswango e lulembo lwa kupona. Ululembo lwa ciswango ni abo bakene icalungama; balibatulile mukutwi, ukuti babe abalufyanya inshiku shabo ishashalako. Abo abapokelela Icikakatikilo cakwa Lesa, e lubatisho lwa Mupashi wa Mushilo. Abena Efese 4:30 itila, “Mwilenga u Mupashi wa mushilo wakwa Lesa ubulanda umo mwakakatikilwe ukufika pa bushiku bwa kulubuka kwenu.” Califika pancende apo umuntu tekuti eminine uwafye nakabili. Ico nacilungama.

¹⁰⁹ Kwati ngo muntu uuleesha ukuya ku Muulu. Alikwete icisasatu icama tiketi. Umwaume alimwipwishe ilyo aninine ishitima, atile, “Ayo ama tiketi ukwete yanshi?” Limo lyali ni Methodist, limbi lyali ni Baptist, limbi lyali ni Sayansi yabena Kristu, limbi lyali ni Seventh-day Adventist, icintu conse calikwete itiketi. Atile, “Mulandu nshi ukwatile ama tiketi yafula ifi?”

¹¹⁰ Atile, “Ukuba, Nalamweba, mukwai.” Atile, “Umo atwalilile ukulanda ukutila *ili* e lyalungama, kabili *ilyo* e e lylungama, kabili Nalibeshe bonse.” Atile, “Natontonkenye ukutila kuti Naleta itiketi ukufuma kuli cila cimo ica muli yena.” Kabili ena alyebawilwe.

¹¹¹ Munyina, kwaba fye inshila imo iyakuya ku Muulu, iyo kupitila muli Kristu Yesu, ukufyalwa cipya cipya ku Mupashi wa Mushilo. “Kano umuntu afyalwa cipya cipya, ena tekuti munshila yonse engile mu Bufumu,” eflyalandile Shikulu wesu Yesu Kristu. Amen.

¹¹² We bushiku bwe buntu tuleikalam, cibusa! We nshita we intu tuleikalamo! We kucinja we! We kusunkana we! Lesa lyonse alashininkisha i Chalichi Cakwe. Lesa lyonse akacita ico! Nshilelanda ukutila bonse bengesa ku Branham Tabernacle. Nshilelanda ukutila bonse baye ku Wall Street. Nshilalanda ukutila bonse baye ku chalichi cabena Kristu, nangu chalichi iili yonse. Ndelanda ukutila Lesa, mu chalichi conse, alikwata ba membala Bakwe, Alikwata ba membala Bakwe aba mu Mubili Wakwe abo abafyalwa cipya cipya. Kabili abo ebaba abacishinka

kuli Lesa. Bena ni abo batemwa Shikulu Yesu ne mitima yabo yonse, kabili ne myeo yabo yonse. Muli no kubasanga balebelenga Baibele yabo, mukulongana kwa mapepo, ukucite fintu fyonse ifyo bengacita ku Bufumu bwakwa Lesa. Ico nacilungama.

¹¹³ Lelo ibumba lyaba cintobe ntobe lili namaka nokubacilila, nokwesha ukubatintila mufintu ifyacalo. Ico tufwile ukukwata ileelo ni Kadeshi-barnea imbi, ico nacilungama, apo ubupingushi butendekela.

¹¹⁴ Nomba cinshi cacitike? Kora aimine nokutila, “Kwaliba abantu abengi abamushilo nga fintu Mose aba.” Kabili akolongenye ibumba ilikalamba capamo. Kabili aile kunse ne li bumba ilikalamba, kabili atile, “Ifwe tuli bakasesema. Kabili ifwe tuli *ici*, kabili ifwe tuli *ico*.”

¹¹⁵ Kabili cinshi cacitike? Lesa aebele Mose, atile, “Ipatule wemwine ukufuma kuli ena.” Kabili Aiswile umushili nokubamina bonse. Iyo e yali impela ya abo bakailishanya, nempela ya abo abantu abaile na Kora.

¹¹⁶ Nomba cinshi cacitike? Lesa atile, “Ifwe tuli noku...” Aebele Mose ukutila, “Tumeni inengu shimo ukuya mukulengula icalo, uko tuleya, uko Nakulaya.” Nga Lesa alibelele ukutila cali calo icisuma, nga Lesa apangile ubulayo Bwakwe bonse, ico camoneke kwati kuti caikusha umuntu uuli onse, Lesa alilandile ico.

¹¹⁷ Nomba, ifwe tuli—ifwe tuli, inshita yonse, nokubilikisha ukutila, “Shikulu Alumbaniwe,” kuli ico. Nomba, munyina, ulya wine Lesa uwapangile bulya bulayo euletupela ubulayo bonse ubo Abapele. Mulandu nshi tuletwishikila *ici*?

¹¹⁸ “Cinshi ico uleesha ukulanda, Munyina Branham? Bushe libumba lyaba cintobe ntobe?” Ee, nifyo fine, ico nacilungama. Lyena li bumba ilyasankanishiwa. Kabili ifwe tuli ku Kadeshi ino ine nshita, uko imwe muli...[Tapali mashiwi pali tepu—Kale.]

¹¹⁹ Abantu abakalamba mu calo! Twalikwata Jack Schuler, Billy Graham. Twalikwata Oral Roberts, Tommy Hicks, Tommy Osborn. Twalikwata abaume ababulamba abaya ukupita mucalo conse cino. Kabili, muno nshita yabushiku, kwaliba ifikulwa fyabwalwa ukucila fintu kwaba ama chalichi. Kabili fileya filefulilako. Nicinshi cilecitika? Kuli ibumba lyaba cintobe ntobe.

¹²⁰ Leken i mwebe icintu cimo. Leken cino calo cikabikapofye ora imo, ubushiku bumo, ukuibika ukuba umusonkano wa mapepo, uko pesenti imo iyekana limo likesha ukwisako. Mukaleka icalo conse cino cikapilibukile kuli Lesa, nokonaula icikulwa ca bwalwa conse icabapo, bakatobaule monse muncende umo bakumbila ubwalwa, nokonaula incende yonse umo bashitisha ubwalwa, nefintu fyonse; nokufula

abanakashi utu utuputula utwafiko, nokucipanga icakukandwa ukutufwala mumusebo; nokuwamya ing'anda, ne ng'anda, ne chalichi; nokubika bakashimikila panuma yacintamba, mucifulo caba 'kalanda; ukulenga ukupuputulwa ukwa nshita yakale ukwisa, uko abaume na banakashi baketa kuli Lesa, tuli nokukwata ukupuputulwa uko kuli nokupita mucalo kabili e bucingo ubwawamisha ubo twatala atukwatapo. E cintu fye cimo mwisonde icikalesha ibomba lya atomiki. Mwalikwata umwakufisama kuma bomba, pesamba lya mapindo Yakwe. Amen. Ico nacilungama. Moneni.

¹²¹ Kadeshi-barnea afikile pacifulo apo kwali nokuba ubupingushi. Kabili Mose asalile ikumi limo nababili, umo ukufuma muli cila mukowa, kabili abatumine ukuya mukulengula icalo.

¹²² Ilyo babwelele, kuti Nakabila mwamona ulo lusebo! "Oh," batile, "calo icisuma. Oh, calo icisuma. Cilefumfumuna umukaka nobuci."

¹²³ "Lelo," ikumi limo pali bena batile, "ifwe tekuti tucipoke. Ifwe tekuti tucipoke. Oh," atile, "ifwe twakumenye a—abena Amori, abena Midia, kabili—kabili abena Kenani, na fyonse ifyo. Mulandu nshi, ifwe twamoneke nge fipaso, pa mbali yabo. Bena bantu abakalamba abakulu. Ne misumba yabo yonse balendamo, kabili tapali inshila iyo tukengilamo. Oh, imitima yesu iletotobela mukati kesu. Ifwe tekuti tucipoke." Kabili, ukusala ukwasuminishiwe nabantu abengi, abantu balicipokelele.

¹²⁴ Lelo kwaiminine babili kulya, umo uwitwa Kalebu, naumbi uwitwa Yoshua, abaletele icisansangu ica myangashi, kabili bantu babili bacisendele. Kalebu atile, "Italaliken mwebene, mucinso cakwa kasesema. Italaliken mwebene." Atile, "Tuli abakukumanisha ukucisenda. Natuleya tucisende, nomba line!"

¹²⁵ Ico tulekabila muli ino nshita muntu uwakubeca ubulayo bwakwa Lesa pa cinso ca bantu. Lesa alilaile ukupongolola kwamapalo ya pentecosti munshiku shakulekelesha, Ndepilibula ukwacishinka ukupongolola, kabili yena ninshita iyakwisa. Kadeshi-barnea naumbi naifika. Ee, mukwai.

¹²⁶ Batile, "Ifwe kuti cawama twacita ico. Mucine, ifwe kuti twacita ico." Cali ni cinshi? Balya ba membala aba camwenso balelolesha kufyo bengamona na menso yabo, lelo Kalebu na Yoshua balelolesha ku bulayo bwakwa Lesa. Nshilesakamana ubwingi bwakulwisha uko bakwete, ifyo amapaka yalemoneka ayakalamba, ifyo amalinga yalemoneka ayakalamba, bena balelolesha ku bulayo bwakwa Lesa.

¹²⁷ Kabili umwaume onse no mwanakashi muno bushiku, uyo ulefwaya ukutwalilila na Lesa, mwiposako amano ayali yonse ifyo isonde lilelanda, nga cakutula kuti twacita nangu tekuti tucite; Lesa alilaile, kabili ico ecicipwishishisha. "Lesa alilanda

ico!” Nalitemwa ico. Ilyo Lesa alanda ifyo, ico cilecipwishisha umuyayaya.

¹²⁸ Ndemweba, muno nshita yabushiku. Twalikwata ukwingi ukuipanga ifyo tawaba. Twalikwata ifingi ifyakuipanga ukucetekela. Twalikwata ifintu ifingi ifyabikwa pakulangishiwa. Mucine. Ciwa alaposa abakumutangilila kuli iwe, ngecakupashanya icabufi icakutinya abantu. Twalikwata Pentecosti wa bufi. Twalikwata imfula yabufi. Twalikwata iyabufi *ici* na *ico*.

¹²⁹ Lelo pakati kaico conse icinono, kwaliba ulubatisho ulwa cine ulwa Mupashi wa Mushilo. Kwaliba amapalo aya cine aya pentecosti, nakabili. Kwaliba ukundapwa kwamaka yakwa Lesa ukwine kwine. Kwaliba u Mupashi uwacine. Kwaliba abantu abacine. Kabili ninshita yakwenda. Ico nacilungama.

¹³⁰ Abantu, pali ora yakupanga ubusalo nomba! Ufwile wapanga ubusalo bobbe. Ici chalichi cifwile ukupanga ubusalo bwaciko. Umuntu onse alesa pacifulo apo kuba ora yakakata. Kwaliko inshita iyakakata iyaishile uko mwapangile ubusalo bweni. Icipuna ca bupingushi, apo mwali. Wali nokutilla, “Ndi no mulandu,” nangu, “Nshili no mulandu.” Ilyo mwaiminina pacinso cakwa kapingula, ufwile wapanga ubusalo.

¹³¹ Kabili, muno nshita yabushiku, Branham Tabernacle ifwile yapanga ubusalo bwaiko. Tufwile twatwalililapo ukwenda nangu ukubwelela kunuma. Ico nacilungama. Mulebwelelamo kuli galiki na—na leeki, nefintu fya mu Egypto, nangu iwe uleya ku cakulya caba Malaika, kucalo ca bulayo uko Lesa apangile ubulayo. Tuleya ku mafashoni yakale, ukupuputulwa kwa Mupashi wa Mushilo; nga teifyo kuti waba uwabula icine, ulepitana, nokukompla nga ka cuni pali apo, mpaka ubushiku bwakufwa. Ufwile wapanga ubusalo bobbe. Tekuti utwalilile. “Mulandu nshi waiminina pakati ka matontonkanyo yabili?” efyo Eliya alandile. “Lesa abe Lesa, mubombe Ena. Nga cakutilla Ena te Lesa, nomba ninshi tamufwile uku Mubombela.”

¹³² Nge cakupitamo icituntulu icakwa Lesa e cifumya ulubembu mu mutima wa muntu, kabili taba membala wamu chalichi, nangu ukuba membala wa mukowa, nangu ukuba membala wa kabungwe, ico Nshikwete nangu cimo icakulandapo icakususha, ifyo fintu filifye bwino. Nga cakutilla. . .

¹³³ Amasambililo tayakalete ico. Twalyesha imiku iingi nokukwata ifishima ifingi ifisuma. Ifwe twatontonkenye, inshita imo, ilyo twakwete Abakalamba Bane, ukutilla ico cikapwisha inkondo shonse. Cena tacapwishishe inkondo. Mwali icaleswa muli cena. Ifwe twatontonkenye, inshita imo, ukutilla ubutantiko bwa masambililo bukapususha isonde lyonse. Kabili twalisambilile, kabili nomba finshi tukwete? Ibumba lyabasambilila abashaishiba lesa. Ico cilfy icalungama bwino bwino. Twamwene ukutilla utubungwe kuti twapususha

isonde. Kabili twalisa sanga ukutula bakabolala ababipisha bafuma muli yalya amabumba ya bantu yabo. Amasambililo ne bumba teti fipusushe isonde.

¹³⁴ Kwabafye Kapususha umo kwisonde, kabili uyo Mulopa wakwa Yesu Kristu uyo wapongolwele ku Kalbale, kukwelelwa pa lubembu lonse ulu umuntu acitile. “Alashilwe pa fya bupulumushi fyesu, afwantilwe pa ma mpulu yesu, ukulimunwa kwa Wakwe... umutende wesu wali pali Ena, kabili mufipumo Fyakwe emo twaundapilwe.” Ndebecana no mwaume onse nangu umwanakashi, mwi Shina lyakwa Yesu Kristu, ukusenda Lesa pa bulayo Bwakwe, muno bushiku, nokumona nga cena cintu calungama nangu icilubo.

¹³⁵ Nalimona abafwa baima; ilyo ba dokota bafuminepo, balanda ukutula nabafwa. Nalimona abapofula balengwa ukumona, abali abapofula pamyaka iinyingi. Nalimona bankoma matwi, nabapofula, nabashenda, nabalemana; baletoloka, nokutoloka, nokulumbanya Shikulu. Nalimona bacilende ukufuma mu musebo nokupangwa muli banamayo. Nalimonapo bacakolwa bafuma mufikulwa fyanjuka, nencende yafintu ifibi mwisonde, kabili ukubapanga bashi mucindikwa naba mushilo. Ndebecanya no mwaume uuli onse ukuleta icintu cimbi icingacitacita ico.

¹³⁶ Nalimona umwaume uwaile kuli ba Cakolwa Abashaishibikwa nokweshu ukulenga aba bwino. Bamuepele inyeleti, ukumupela fyonse, nefyakubelenga amano ifyabamo mwisonde, naba dokota ababako abaishibisha abengasangwa ukubapela imiti, kabili cafilikwa. Kabili Nalimona uyo umwaume umo wine bamutola ku Mulopa wakwa Yesu Kristu, nokumupanga uwashila wakwa Lesa, kabili kashimikila wa Mbila nsuma. Amen.

¹³⁷ Muletontonkanya Ndi kakunkuluka wa mushilo? Nalimo efo Naba. Cisuma! Lelo nga cakutula cena cisenda ishina lyakwa “kakunkuluka wa mushilo” ukusanga ububile pamo na Kristu, kabili nokuba uwasekwa ne sonde, lyena Ndi umo uwamuli bena. Ico nacilungama. Lolesheni. Nali Mutemwa.

¹³⁸ Naukwata ubusalo bwakupanga. Uli pa Kadeshi, mwamona; mwamona, tekuti wiminine panshita iitali. Mulandu nshi waiminina pamatontonkanyo yabili? Mulandu nshi ichalichi tacibelele pamulilo? Mulandu nshi incende iyaisulamo abantu? Mulandu nshi ifishibilo ifingi nefipapusho tafilecitikila? Mwicibika pali kakumba. Nimwe. Twalikwata ibumba ilyasakanishiwa; liletintila uku, nakulubali lumbai. Ufwile wafika panshita yakupanga ubusalo. Nga cakutula ni kakumba, mutamfyeni, mufumyenipo nokubikapo umbi uwalasenda incende yakwe. Nga cakuti ni dikoni, mufumyeni mwibumba lyabakalamba nokubikapo umbi uwalasenda icifulo cakwe. Ni cinshi ico uli nokucita, muniyina? Lesa alibika umulimo

pali iwe. Ico eco. Kabili ifwe natukwata, cila umo, tulingile ukulondolola pa membu shesu fwebene, no kwasuka pa Bushiku bwa Bupingushi. Ifwe tuli mu Kadeshi-barnea!

¹³⁹ Kabili i Cebo cakwa Lesa catile ifwe kuti twacisenda. I Cebo cakwa Lesa catile ifwe kuti twakwata ukupuputulwa. I Cebo cakwa Lesa calanda ukutula Ali nokwimya munshiku shakulekelesha, fyonse ifi ifishibilo pano nefisungusho. Kabili Alicita ico. Umuntu onse naiminina mucifulo cakwe, lelo icintu ico tufwile ukucita kwisa capamo nokutampa ukupuputulwa. Ni cinshi ico twingacita? Ukusala kwenu limbi kuti kwaisa nomba. Ukusala kwenu limbi kuti kwaisa inshita imbi. Nomba nga kwaisa nomba, ufwile waankulako kuli kwena. Mwatila, “Oh, munyina, Ndi . . . Ukuba, Nkapanga ubusalo ubushiku bumo.” Iwe ufwile wapanga ico. Kabili ino nshita e nshita yakupanga ubusalo. Kwaliba inshita ilyo iwe wa . . .

¹⁴⁰ Lintu iwe waleya pamo no mukashi obe, munyinane, wali nokupanga ubusalo nga cakutula wali nokupa nangu iyo. Wali nokupanga ubusalo. Cena limbi kuti caisa, bamo ulu lubali baletila, “Iwe taufwile waupa.” Bamo batila, “Ukuba, iwe cawama waupana.” Umo atile, “Ukuba, kuti waba nensansa nganshi nga cakutula walyupwa.” Umbi atile, “Uleputula umukolomino obe.” Fyonse ifi fintu ifyapusana pusana. Iwe wali nokupanga ubusalo. Ico nacilungama. Ubupingushi, ubwa Kadeshi-barnea, bwaishile iwe.

¹⁴¹ “Limbi imwe bamo pano muli mukulekana.” Kufwile kwaba inshita, panshita imo, ilyo ukupusana kwisa mulupwa. Kufwile kwapwishiwa, munshila imo. Mufwile mwapanga ubusalo. Leka nkwebe, munyinane, muno nshita yabushiku, ubusalo bwakupanga ni ubu, iwe nomukashi obe mubike amaboko yenu kuli umo nomunankwe, nga kuti mwafukamina Lesa, nokuba pamakufi yenu, nokupanga ubusalo ukuti mwalabombela Yesu Kristu, kabili Eka fye, kabili nefilye fyakulekana fikashalafye umwabula abantu. Cisuma! Takuli ukulanshanya na ndubulwila ukulefwaikwa. Ukulanshanya na Kapususha obe ekulefwaikwa. Ico nacilungama. Ndubulwila kuti ukupanda amano, lelo Kalubula kuti akupususha. Ndubulwila kuti akulanga ifyakubelenga amano, yamo pamasambililo yakumona ifyakumipashi, lelo Yesu Kristu kuti akupela ukusenamina Kwakwe no kutemwa. Cikasenda icifulo ica fyonse filya.

¹⁴² Nga naulwala muno bushiku, ulingile ukukwata ukusala nga cakutula iwe walapokelela Kristu nga kondapa obe, nangu iyo. Tekuti uleshanye, uwaye waye naco. Ufwile ukutula, “Na Mucetekela,” nangu, “Nshile Mucetekela.” “Ndi nokupola,” nangu, “Ine tekuti. Nshakwata icicetekelo icalinga ukuti ningaba bwino.” Iwe ufwile wapanga ubusalo bobbe.

¹⁴³ Nga uli mubembu, muno bushiku, ulingile ukukwata ukusala kobe. Uli pa Kadesh-barnea. Uli pancende iyacipuna

cabupingushi.

¹⁴⁴ Bushe tulya utufukauka twali nicinshi? Ma chalichi, ayaleiminako, ayo ayafumine, uko ubupingushi bwatampile mu ng'anda yakwa Lesa. Yesu efyo alandile. Ba—Baibele efyo yalanda. Ubupingushi butendekela mu ng'anda yakwa Lesa. Ifwe tuli mu ng'anda yakwa Lesa, muno bushiku, kabili ulingile ukupanga ukusala kobe.

¹⁴⁵ Ufwile wapanga ubusalo bobbe, nga cakutilla kuti waisa kuli Kristu, nangu nga cakutilla kuti wa Mukana muno nshita ya bushiku. Umubembu onse muno alingile ukukwata kulyo kusala ino ine nshita.

¹⁴⁶ Ufwile walafuma pa ciibi, uwawaminako umwaume nangu umwanakashi ukucila efyo wacisa, nangu walaya uwabipisha ukucila ilyo wacisa. Teti wimininefye ngo muntu yawe yawe muno nshita yabushiku. Ufwile wabupanga.

¹⁴⁷ Ici cali pa mutima wandi, nomba cili pa...Cena cali pa mutima wandi, nomba cili pa kuboko kobe. Ufwile wapanga ubusalo bobbe. Kabili ufwele wapanga ubusalo. Limbi waliba membala umusuma uwamu chalichi. Limbi lyonse walekabilla ukutilla walefwaya Lesa ukucilapo. Limbi kuti walefwaya ukucitilla Lesa icintu cimo. Ibukisha, uli muntu uufwaye umuku umo, kabili muku fye umo uyo uli nokubafye umuntu uufwa. Kabili ino limbi kuti yaba ninshita iyo ufwele wapanga ubusalo bobbe. Iwe limbi kuti waya na Lesa, nangu ukwikala apo uli.

¹⁴⁸ Iwe limbi kuti wapanga ukusala kobe muno bushiku. Nga cena efyo cili, Napepa ukutilla wingafumyapo ifintu fyonse. Ibukisha, Nshilesakamana ifyo ico cili, nga nincito yobe, nga lupwa lobe, nga batemwikwa, nga bantu usangwa nabo, nga batemwikwa bobbe, nangu bonse bantu bengaba, lekelako kuli fyonse. “Uyo uwabika nokuboko kwakwe pakulima, kabili apilibuka nokulolesha kunuma, talingilwa ukulima.” Ico nacilungama. “Bika lubali icafina conse nolubembu ulukutebelela mukwanguka.” Nicinshi ico? “Bikeni lubali icafina conse, kabili nokukana cetekela uko ukukutebela mukwanguka, nokubutuka ulu lubilo nokutekanya, ukwabikwa kucinso cobe.”

Natupepe.

¹⁴⁹ Taata uwamu Myulu, mwi Shina lyakwa Yesu Kristu, u Mwana wakwa Lesa, Ndeleta iyi mbila inono kukwisala, nokuiposela pa mutima wa bantu. Mwebaishiba imitima ya baume bonse na banakashi bonse, Mwebaishiba imitima ya mulumendo onse no mukashana, mwalishiba umutima wa muntu onse. Mwalishiba umutima wandi. Kabili ukufuma fye konse kulya ku cintamba ukuya kuli kalinda, Shikulu, Mwalishiba umutima wa muntu onse. Namwishiba ico

tulekabila, tatwishibe. Icintu fye cimo ico twaishiba, twalishiba ukutula tulekabila Yesu.

¹⁵⁰ Kabili, O mwe Kristu wakwa Lesa, bushe kuti Mwalaya (iyo, Shikulu) kabili nokukana fikilisha ico? Mwatile, “Apo ponse apo babili nangu batatu balongana mwi Shina Lyandi, Ndi nokuba pakati kabo. Kabili nga cakutula kuti baipusha icili conse mwi Shina Lyandi, Ndi nokucita ico.” We kubeca we kwi chalichi cesu, Shikulu! We kubeca we kubantu besu bonse! We kubeca we ku bantu besu, muno bushiku, uko Mwatupela! “Nga mwabulisha icintu icili conse, ipusheni kuli Lesa. Ali nokupela ico.”

¹⁵¹ Nomba Napepa, Mwebatemwikwa Taata wamu Myulu, ukutula, muno bushiku, kabili Muli nokupongolola u Mupashi wa Mushilo, uwakushinina, nokushinina umutima onse pafyakukabila kwabo. Nowandi, pamo nao, Shikulu, ilyo tulelolola pali Imwe, mwi Shina lyakwa Kristu.

¹⁵² Nomba ilyo tucili natukontamika imitwe yesu, nkashi ali nokutupela apakutampila pa cinanda. Nalamwipusha ilipusho. Ino limbi kuti yaba ninshita yenu iyabusalo.

¹⁵³ Nibanga muno, bushe kuliko umwaume umo nangu umwanakashi, umulumendo nangu umukashana, uyo uushili mwina Kristu, uyo aba umubembu? Kabili ulefwaya ukupanga ubusalo bwakwa Yesu Kristu, kabili uleumfwa ukutula Icintu cimo cilekonkonsha pa mutima obe pali ino nshita? Bushe kuti mwaimya ukuboko kwenu pakusala kwenu, nokutula, “Ine nomba napanga ukusala kwandi ukwakubombela Kristu”? Lesa amupale, mukwai. Umuntu umo naumbi? “Nomba napanga ubusalo bwandi.” Lesa akupale, we namayo umunono. Umuntu umo naumbi? Lesa akupale, kunuma uko, namayo umunono.

¹⁵⁴ Umuntu umo umbi, ukupanga ubusalo bobee? “Nomba ndi nokubombela Kristu. Nimfika kumpela. Nimfika ku bwafya. Ino e ora. Ndi pa Kadeshi-barnea. Lesa naiminina mu mutima wandi. Bushe kuti Natoloka? Bushe kuti Nasha cibusa wandi? Bushe kuti Nasha umunandi wa mwisonde? Bushe kuti Naabuka ulya mupaka kulya, ukuya mu Calo ca Bulayo uko Lesa alaile? Bushe Nkaba Kalebu, bushe Nkaba Yoshua mwi lyashi lyakale ilya nshita? Bushe Nkaba Kalebu nangu Yoshua mu ma buuku yakwa Lesa? Nangu, bushe Ine, muno nshita yabushiku, ndetotobela muli bucamwenso bwandi, umubele wa mutuntula, nokuselela kunuma?” Mwe Lesa, fumyeni ico pa mwaume onse no mwanakashi, nokupanga ubusalo bwabo, ukusala Kristu muno nshita yabushiku. Bushe kuti mwaimya ukuboko kwenu? Ine . . . Umo na umbi. Lesa amupale. Ndemumona kunuma kulya.

¹⁵⁵ Umuntu umo umbi? Abali panse, kuti mwaisa pe windo pancende imo? Kabili mubike ukuboko kwenu pe windo, nokutula, “Ndi nokupanga ubusalo bwakwa Kristu. Ndi pa Kadeshi-barnea, Munyina Branham.”

¹⁵⁶ Bushe kuliko naumbi muno uwingacita ico? Bushe kuliko uwabwelela inuma uwingatila, “Nalapanga ubusalo bwandi, muno nshita yabushiku. Inshila yamubembu yalikosa. Nshili nokubombela isonde nakabili. Ukufuma muno nshita yabushiku, Ndi nokubombela Kristu. Nomba napanga ubusalo bwandi. Nalaimya ukuboko kwandi. Ndi mubembu. Kabili Nali umwina Kristu, lelo Nalibwelela kunuma, kabili Ndefwaya Lesa ukumbelela uluse.”

¹⁵⁷ Bushe kuliko umo muno bushiku, uyo uuli umwina Kristu, uyo uuli umwaume nangu umuntu wakwa Lesa, kabili ulawaya waya mu Nshila, taucita fintu Lesa akweba, ulaya pamulu na panshi, ulomfwa kufintu ifyo taufwile ukumfwako, walicita ifintu ifyo tawalingile ukucita, kabili ulefwaya Lesa ukukwelela, kabili ulefwaya ukutampa cipya cipya ukufuma muno nshita yabushiku, walasala Lesa nomba line nokutla, “Nalacita ico”? Bushe kuti mwaimya ukuboko kwenu? Lesa amupale. Lesa amupale, imwe, imwe, imwe. Oh, ico cawama. Cisuma.

¹⁵⁸ Umuntu onse umbi wimyeko ukuboko kobe? Ndefwaya wimyeko ukuboko kobe. Uko ekupangwa kobe, ukwakwa Lesa. Lesa alemona ukuboko kobe. Watila, “Busuma nshi ico cicita?” Oh, imya ukuboko kobe ukwa kukulyo inshita imo, kuli Lesa, nokumona ifyo cena cicita. Imyeni ukuboko kwenu ukwa kukulyo, mufilye, mulabepo bufi, nokumona ico cilecitika kuli imwe, mukekatwa kuli cena. Imyeni ukuboko kwenu kuli Lesa nokupanga umulapo, kabili nomba mumone nga cakutla Mupashi wa Mushilo tamwikete ukupitila muli ico. Ilyo Lesa ali pa ciibi ca mutima wenu, imwe kupanga ukusala kwenu.

¹⁵⁹ Muli pa Kadesh-barnea. Kwishilya kuli amapalo yonse ayo Lesa amulaya. Kulya kuli ukupuputulwa ukwa mafashoni yakale. Kuli insansa, umutende, ukukokola ukufulwa, ubusuma, ukunakilila, ubupete, ukutekanya, ukulambalele pacinso cenu, kabili tamwacikwata. Cena cenu. Lesa alicilaya kuli imwe. Bushe mulecifwaya?

¹⁶⁰ Bushe kuli ulupwa pano ululi mupepi nokulekana? Mulatalikana nokuilishanya cila umo nomubiye, kabili mwalishiba ukutla tamufwile ukucita ici. Iwe uli nensoni, umusango ucitilamo pa mukashi obe, nangu umulume obe, kabili ulefwaya Lesa, muno bushiku, kukusenamina Kwakwe, ukukupela ukusenamina kwakucimfya, ukubika ukuboko kobe ukumukumbatila, nokutla, “Wemutemwikwa, ukupitila mukusenamina kwakwa Lesa, ukufuma muno bushiku ukuya kuntanshi, ukusala kwesu, ‘Ndi nokwikalila Lesa.’” Imyako ukuboko kobe. Bushe kuliko ulupwa? Cila umo ne mitwe yenu iyakontamikwa nomba. Imyeni fye ukuboko kwenu. [Tapali kantu pali tepu—Kale.] Ndetasha nganshi ukutla takuli. Lelo nga kuliko, Lesa alishiba ifyakusunga ifintu fyonse.

¹⁶¹ Nga kuliko umuntu muno muno nshita yabushiku uwalwala,

panshita iitali, kabili nomba ulemoneka kwati walipepelwapo, lelo tawakwata icicetekelo icakucimfya, lelo ino ine nshita ukutila uli nokupanga ubusalo bobo ukutila: “Shikulu Lesa, ukufuma ino ine ora Ndi noku Mubombela, kabili Nalafuma pano ndepela ubunte ku kusenamina kwakwa Lesa ukutila ku filaso Fyakwe Nalipola, kabili Nalacetekela ico ukufuma ino nshita yabushiku.” Lesa akupale, namayo. Lesa amupale, mukwai. Lesa akupale, na iwe. Cisuma. Ico nacilungama. Nalamupepelako mu ma miniti ayanono. Nalaipusha Lesa ukumupela ico.

¹⁶² Ndeingililamo, muno bushiku, nga cakuti kuli umo mubantu uyo ushaba umwina Kristu, uwingafwaya ukwisa kucipailo nokufukamako? Icipailo nasisuka. Nga kuti mwatemwa ukupepa ipepo ilyaisuka kuli Lesa, icipailo nasisuka. Kuwabwelela inuma nangu uwafuma munshila umwaume, onse untu engaba, icipailo nasisuka. Muli abapokelelwa. Uli pa Kadeshi. Ubupingushi epo buli. Lesa naiminina na maboko ayatambikwa, uwaiteyanya.

¹⁶³ Ulyo muntu umulwele kuti afwaya ukwiminina pa nkasa shakwe, ukuti engalanda pacintubwingi ukutila nomba nabapokelela Kristu nga Kondapa wabo. Nokutila, “Ukufuma buno bushiku ukuya kuntanshi, Ndi nokucetekela Lesa,” kabili nokubapepelako. Nga kuti mwacita ico, muli abasengelwa ku kwiminina pa nkasa shenu. Cisuma.

Batatu namwiminina. Twalililenipofye ukwiminina, nga kuti mwacita ico.

¹⁶⁴ Nomba, Taata wamu Myulu, ilyo bali pa makasa yabo, Mupashi wa Mushilo alelanda. Kabili Napepa kuli Imwe, Shifwe uwa mu Myulu, ukutila uluse Lwenu lupelwe kuli uyu mwaume, bonse babili, noyu namayo, noyu umwaume umbi uwaiminina nomba line. O mwe Lesa wa Muyayaya, ukupitila mufipumo fyakwa Shikulu Yesu Kristu, emo baundapilwe. Lesa, namuleta ico panshi. Namupanga ico ukuba icituntulu ku bantu. Kabili Napepa . . . Shikulu, Mwatile, “Takuli umuntu uwingesa kuli Ine, kano Taata Wandu amuleta.” Kabili nomba Mupashi wa Mushilo nalanda kuli bena, kabili tapali nangu cimo cimbi icingacitwa. Bena nabapanga ubusalo bwabo, ukutila muno bushiku bena na ba Mupokelela nga kondapa wabo. Kabili bali nokufuma muli ino ihema nabacetekela ukutila balaba abatuntulu kabili abaundapwa.

¹⁶⁵ Shikulu, cena tekuti cifilwe, ukucila pafyo Lesa engafilwa. Ifwe natwiluka ukutila takuli umuntu uwalinga ukucila pafyo icebo cakwe caba. Kabili muno nshita yabushiku, nabacetekela kabili nabasumina. Kabili lekeni bapokelele ico, Shikulu, ilyo Napepa ili ipepo lya cicetekelo pali bena, mwi Shina lyakwa Kristu. Amen.

¹⁶⁶ Kuti mwaikala. Lesa amupale. Cetekeleni ico nomutima wenu onse, amafya yenu nayapwa.

¹⁶⁷ Nibanga ba Mutemwa kabili kuti bafwaya ukwenda ukuya ku Sioni na Ena? Natumone amaboko ayemishiwe. Ico naciwama. Te mulandu uchalichi mwabako. Cisuma.

¹⁶⁸ Natwiminine pa makasa yesu nomba ilyo tuleimba *Bule Shina Lyakwa Yesu Pamo Nobe*. Cisuma, nkashi, nga watupela . . .

. . . i Shina lyakwa Yesu . . .

¹⁶⁹ Nomba pilibukeni nokuposhanya no muntu umo uupalamene naimwe. Tambikeni amaboko nokuposhanya.

. . . uwabulanda;

Likakupelo ubuseko necitalaliko,

Lisende Lyena konse uko uleya.

Oh i Shina lisuma, (Ishina Lisuma!) O ifyo lyawama!

Isubilo lyesonde kabili ukusangalala kwamu Muulu;

Ishina Lisuma, (Ishina Lisuma!) O ifyo lyawama!

Isubilo lyesonde kabili ukusangalala kwamu Muulu.

¹⁷⁰ Bonse aba Mutemwa, eka, no mutima wenu onse, no mweo wenu onse, na mano yenu yonse, na maka yenu yonse, imyeni ukuboko kwenu nga *ifi*, nokutla, “Shikulu Alumbanishiwe.” [Ulukuta lwatila, “Shikulu Alumbanishiwe.”—Kale.] Ico cawama. Cisuma, nomba:

Pe Shina lyakwa Yesu ukufukama,

Ukupona ubunkupeme pa nkasa Shakwe,

Imfumu ya shamfumu . . .

Lintu ubulendo bwesu bwapwa.

Ishina Lisuma, O ifyo lyawama!

Isubilo lyesonde kabili ukusangalala kwamu Muulu;

Ishina Lisuma, O ifyo lyawama!

Isubilo lyesonde kabili ukusangalala kwamu Muulu. 

56-0527 Pa Kadeshi Barnea
Branham Tabernacle
Jeffersonville, Indiana U.S.A.

BEMBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalemwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org